

E sospechoso ta para riba cu no ta asina

Fiscal a exigí 5 año di prison pa homber cu a maltrata, menaza y viola dama

ORANJESTAD (AAN) – Un relacion amoroso caminda e pareha tin dos yiu, a caba den un caso di maltrato, menaza y violacion. E sospechoso homber M. ta para riba cu e no a viola e dama L. El a admiti di a dal e dama klap na su bil y cu un henger na su pia pero nada mas. Fiscal ta haya M. culpable y a exigí 5 año di prison. Abogado mr. Griffith a cuestiona un forma di set up di e victima caminda el a wordo instrui door di un agente di Polis. Hues ta bay studia e caso y dentro di tres siman tin sentencia. Den e articulo aki, DIARIO ta concentra riba tratamento di e caso y exigencia di Fiscal. Den un otro articulo ta publica e punto di bista di e abogado mr. Griffith.

ACUSACIONAN

E acusacionnan cu Fiscal a presenta den Corte contra M. ta cu riba 8 Juni 2018, a maltrata e dama L. y menace. E otro acusacion ta cu riba 13 Juni 2018, M. a viola e dama L. Subsidiario cu e acusacion aki, Fiscal a bisa cu M. a maltrata e dama cu un henger y menace. Fiscal a sigui cu dia 1 Juli 2018 atrobe M. a viola e dama.

Den sala di Corte tabata presente famianan di e sospechoso. E victima dama tabata presente hunto cu su abogado mr. Rosenstand. Ta asina cu M. lo tin dos yiu chikito cu e dama L.

MALTRATO CU VIOLA

Hues a puntra M. si ta berdad cu na April 2018 el a menaza e dama L. cu morto si e bay cu un otro

homber. M. a admiti cu el a bis'e asina na telefon y despues a sere. El a bisa cu tur e otro cosnan cu e dama L. ta bisa, no ta cuadra. Hues a bisa cu na Mei 2018, L. a bay Polis pa haci denuncia cu M. no ta lag'e na paz y constantemente ta molesti'e. M. a bisa cu esey no ta berdad. Hues a bisa cu L. a bisa cu e tin hopi miedo di M. Tabatin un momento cu M. a yama L. y tanto e agentenan di KZP como L. a scucha con M. ta menaza cu si L. no kier tin relacion sexual cun'e, e lo kima e cas. Den Corte, M. a desmenti esaki. Hues a bisa cu tanto L. como e dos agentenan di Polis a scucha e combersacion. Na dado momento M. a cuminsa yora y cu cabez abao a bisa Hues cu ta duel e loke a pasa.

Por a nota cu e famia di M. tambe tabata emocionada. M. a desmenti categoricamente ora Hues a muestra cu M. lo a viola e dama L. na Juni y July 2018. Hues a bisa cu tin potret di L. cu lo tin marca na su parti intimo y cu L. ta bisa cu M. a kinipi'e eyan. M. a desmenti esaki. Tambe el a desmenti categoricamente di a maltrata L. y menace. El a bisa Hues cu loke L. a bisa Polis di e menaza y di a force pa tene relacion no ta berdad. Durante interrogacion di Fiscal, M. a admiti di a dal L. cu un henger na su pia. Tambe el a bisa di a klap L. dos biaha na su bil.

Hues a muestra cu segun raport di Reclasing, M. ta rabia liher. Psicologo ta muestra cu M. no ta re-

conoce cu e ta culpable. Psicologo ta recomenda pa M. ta bao guia di Reclasing. M. a bisa Hues cu el a haya menaza den KIA di personanan pero e no sa kende nan ta.

DEMANDA DI DAÑO

Abogado mr. Rosenstand a entrega na Hues demanda di daño, cu ta mas cu 8 mil florin. E abogado a splica cu L. y su 2 yiu nan mester a haya tratamento di psicologo. Tambe cu e mester a busca otro lugar di keda y e gastonan di abogado. Abogado mr. Griffith a reacciona riba e demanda mostrando cu e dama no mester a busca un otro lugar di keda y cu el a bay Fundacion Hende Muher den Dificultad caminda nan por a yud'e cu psicologo gratis. E no ta mira pakico e no a haci uso di esaki. El a pidi Hues pa rechaza e demanda.

FISCAL

Fiscal a bisa Hues cu durante tratamento di e caso por ripara cu M. tin dificultad pa reconoce algun di e hechonan. Na opinion di Fiscal, M. a desmenti di a menaza y maltrata pero agentenan di KZP mes a scucha via speakerphone e menaza. Fiscal a bisa cu e no ta compronde pakico M. no ta admiti tur cos. Por bien ta cu e tin berguena pa loke a sosode.

Fiscal a bisa Hues cu e victima a filma momento cu M. lo tabatin relacion cun'e y cu e imagnan ta emocionante. E victima a entrega esaki na Polis, cu ta wordo usa como prueba. Fiscal a sigui bisa cu tin marcanan di kinipi na

e parti intimo di victima. Tambe tin menaza serio y tambe cu M. a maltrata e dama. Fiscal ta haya cu M. a viola e dama door di a maltrata e dama y despues a force tene relacion sexual.

Fiscal ta haya cu M. no tin respet pa e dama y tabata kier yena su deseo. E ta haya cu M. no kier reconoce su culpabilidad. Fiscal a exigí 5 año di prison pa M., kitando e tempo cu e ta sera den KIA. Pa

loke ta e demanda di daño di e victima, Fiscal ta haya cu ta logico cu mester di ayudo psicologico. Tambe cu mester a busca un otro lugar pa biba y asistencia di abogado. El a bisa Hues pa aproba e demanda di daño y pa pone e medida di pago.

Hues, despues di a scucha defensa di mr. Griffith a sera tratamento di e caso y a bisa cu dia 22 November 2019 lo tin sentencia